

## Aarme Haarm

---

Aarme Haarm....aarme Haarm...aarme Haarm...aarme Haarm

*Dit verhael is waor gebeurd  
't Gaot over een aarme sloeber  
Die alles in et leven tegen zat:  
Aarme Haarm*

Vri'jdags de dattiende van de maand  
begon oons Haarm zien bestaon  
En dat begon drekt al verkeerd,  
hi'j wodde geboren, voeten eerst  
Zien heit, een inbreker van allure  
die raekte nog eerst wat overstuur  
Mar zag al rap, en was tevreden:  
zien zeune zol in zien voetsporen treden

Haarm hadde anleg, dat was wis  
jatten kon ie, lang niet mis  
Want kreeg ie de borst van moeke Griet,  
dan was ze d'r steevaast ientien kwiet

Aarme Haarm...aarme Haarm...aarme Haarm...aarme Haarm

Hi'j gruide op veur galg en rad,  
omdat zien heit besleuten hadd':  
Een slechte jeugd, flink asociaal  
is veur een inbreker ideaal  
Want veur een eventueel gerecht  
doet dat et altied lang niet slecht  
Dan blief ie mooi uut et kesjot  
en kommen mit veurwaardelik vot

Zo gongen de jonge jaoren veurbi'j  
Haarm wilde vot, hi'j wilde vri'j  
Besleut dus naor de stad te gaon  
om daar op eigen bienen te staon

Aarme Haarm...aarme Haarm...aarme Haarm...aarme Haarm

Mar 't noodlot kreeg 'm weer te pakken  
in een nauw stegien,ach, de stakker  
Daor leup hi'j Dinie tegen et lief,  
dat was nogal een vri'j dik wief  
Ze zaten klem, et duurde daegen  
veur de brandweer ze vri'j kon zaegen  
En doe bleek ok nogal ras  
dat Dinie behoorlik zwanger was

Dinie docht, now hebb' ik beet en  
Haarm wol van gien trouwen weten  
Waarop et vrommes hem besprong  
zodat ie kwaoliek aosemen kon

Aarme Haarm...aarme Haarm...aarme Haarm...arme Haarm

Zo gaf hi'j toe, letterlik onder drok  
mar 't huwelik brocht hem gien gelok  
Haarm gong d'r bi'jna an kepot  
Dat kon zo niet, dus leup hi'j vot  
Hi'j zwalkte jaoren over straot  
et gong mit Haarm van slim tot kwaod  
Et zwarversleven maekte hem ziek:  
een dreuge hoest en rimmetiek

Mar goed, hi'j was now anoniem  
en wol dat hiel graeg ok nog blieden  
Tot op een dag, in febrewaori,  
et lot 'm weer vun, potverdorie

Aarme Haarm...aarme Haarm...aarme Haarm...aarme Haarm

Haost te bar om over te praoten,  
moest oons' Haarm et leven laoten  
't Was de dattiende, donderdag  
dat hi'j zien aende zag  
Dinie was Haarm niet vergeten  
zocht in 't paark, en gong, moej' weten,  
uutgerekend op de deuze zitten  
waar oonze Haarm in lag te pitten

Zien leste woorden weren snikkend:  
Oonze relaasie is te verstikkend  
En doe blaosde hi'j, tot besluit  
zien allerleste aosem uut

Aarme Haarm...aarme Haarm...aarme Haarm...aarme Haarm

Dit verhael is waar gebeurd  
't Gaot over een aarme sloeber  
die alles in et leven tegen zat:  
Aarme Haarm